



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

LWETI 2023

TICONDZISO TEKUMAKA

EMAMAKI: 80

Leticondziso tekumaka tinemakhasi la-19.

TICONDZISO TEKUMAKA

1. Uma umhlolwa aphendvule imibuto lengetulu kwaleyo lelindzelekile, maka timphendvulo letisekucaleni kuphela. (**Umhlolwa akumelanga aphendvule indzabambhalo kanye nemibuto lemifisha encwadzini yinye.**)
2. ESIGABENI A, Uma umhlolwa aphendvule ngato tonkhe totine tinkondlo (Tinkondlo letifundvwe eklasini), maka letimbili tekucala kuphela.
3. ESIGABENI B na-C (Lulwimi Lwasekhaya), Uma umhlolwa aphendvule imibuto lemibili kulemifisha nobe imibuto lemibili yendzabambhalo, maka imphendvulo yekucala kuphela uyekele lelandzelako. Uma ngabe umhlolwa aphendvule yomine imibuto, maka kuphela imphendvulo yembuto wekucala kuleso naleso SIGABA, ngaphandle kwekutsi uphendvule munye umbuto lonemibuto lemifisha namunye umbuto loyindzabambhalo.
4. Uma umhlolwa anike timphendvulo letimbili lapho imphendvulo yekucala iliphutsa kantsi lena yesibili iliciniso, akumakwe imphendvulo yekucala yesibili ingamakwa.
5. Uma timphendvulo tingahambisani netinombolo temibuto, maka ulandzele ticondziso.
6. Uma liphutsa lesipelingi litsikameta inshokutsi, akunganikwa limaki, kantsi nangabe inshokutsi ayitsikameteki, akunikwe limaki.
7. Umbuto loyindzabambhalo: Uma indzabambhalo inemagama langaphasi kwalawo lamisiwe, umhlolwa akangajeziswa ngobe vele sewutijezise yena ngekwakhe. Uma indzabambhalo iyindze kakhulu, akahlolwe ngekwelikhono lakhe bese kuociswana nalabaphetse umsebenti wekumaka. **Akusetjentiswe irubhriki yekumaka indzabambhalo** lesesichibiyelweni A na-B.
8. Imibuto lemifisha: Uma umhlolwa angakafaki bokhulumile nakufanele acaphune **akangajeziswa**.
9. **Emibutweni levulekile** bahlolwa abanganikwa emamaki uma baphendvule ngetimphendvulo letitsi: YEBO/CHA nobe NGIYAVUMA/ ANGIVUMI. Onkhe emamaki anikwa sizatfu/kuchaza ngalokugcwele/ kwesekela/kucaphuna.
10. Emibutweni lefuna LICINISO/LIPHUTSA nobe LIPHUZU/UMBONO emamaki akangehlukaniswa emkhatsini, lokusho kutsi alikho limaki lelinikwa LICINISO/ LIPHUTSA nobe LIPHUZU/UMBONO, onkhe emamaki anikwa sizatfu/kuchaza ngalokugcwele/kwesekela/kucaphuna.

SIGABA A: TINKONDLO**TINKONDLO LETIFUNDVWE EKLASINI****UMBUTO 1: UMBUTO LOYINDZABAMBHALO****'AWUTFOLAKALI' – FC Nkosi**

Sakhiwo sendzabambhalo kumele sivete singeniso, umtimba nesiphetfo.

SINGENISO

Bahlolwa bachaza sihloko, babuye bavete kutsi lenkondlo lets, 'Awutfolakali' iyisathaya.

UMTIMBA:

Kwesekelwa ngemigca lesenkondlweni leveta kutsi lenkondlo iyisathaya:

- Sonkondlo ugceka lesimo selitulu utsi, akasati kutsi sifunani, ngiso kuphela lesatiko.
- Sonkondlo ugceka kutsi uma kusa, lesimo selitulu siba ngulokunye, litsi liyewushona sibe sesigucukile.
- Sonkondlo ugceka kutsi ekuseni liyashisa bese entsambama liyana nobe kuyabanza.
- Sonkondlo ugceka lesimo selitulu lesiye sishubise umnkantja, sente bantfu batibute kutsi banetingubo letingaki.
- Sonkondlo ugceka lesimo selitulu kutsi sente bantfu babanjwe yimikhuhlane uma kubandza kakhulu.
- Sonkondlo utsi imitimba iyamangala ingati kutsi kumele yente njani.
(Naleminye imibono lenembako yemukelekile.)

SIPHETFO

Bahlolwa basonga konkhe labebabhala ngako lapha ngenhla, ngekusho kutsi sonkondlo uphumelele kuveta bufakazi bekutsi lenkondlo iyisathaya/inkondlogceka.

CAPHELA: Bahlolwa kumele bacaphune imigca lefakazela kutsi lenkondlo iyisathaya.

**BONA EMARUBHRIKI EKUMAKWA KWENDZABAMBHALO YETINKONDLO,
SIGABA A:**

[10]

UMBUTO 2: IMIBUTO LEMIFISHA**'MADIDA' – NP Ndlovu**

- 2.1 Sifanangwaca ngobe lamagama alomugca acala ngemsindvo lofanako, 's'. (2)
- 2.2 Sidvonsamoya ngobe uyaphumula uma ufundza lomugca.
(Naleminye imibono lenembako yemukelekile.) (2)
- 2.3 Ilirikhi/Inkondlomvangedvwa, sonkondlo uvete imiva yakhe ngelutsandvo lolungavisiseki. (2)
- 2.4 Sonkondlo ucondze kutsi lutsandvo lukwehlukanisa nebangani unamatsele kulowo lomtsandzako/Lowo lotfole lutsandvo uhlubuka bangani labephila nabo anamatsele kulesitsandvwa sakhe lasitfolile.
(Naleminye imibono lenembako yemukelekile.) (KUNYE kwaloku.) (2)
- 2.5 Usisebentise ngemphumelelo ngobe lutsandvo luvele luntjontje inhlitiyo yemunfu angakanaki/angakalindzeli.
(Naleminye imibono lenembako yemukelekile.) (2)
- [10]**

UMBUTO 3: IMIBUTO LEMIFISHA**'UNGENYULILE' – FC Nkosi**

- 3.1 Imphindvwa ngobe tonkhe tindzima talenkondlo tigcina ngemugca lofanako lotsi 'Yekukubonga ngingacedzi.' (2)
- 3.2 Imvumelwanosicalo ngobe yomibili lemigca icalisa ngelilunga lelifanako 'Se.' (2)
- 3.3 Sonkondlo uvete umoya wekudvumisa/wekubongelela/wekuhalalisa/wenjabulo ngobe uMdali amsindzise ekufeni. (2)
- 3.4 Sonkondlo abegulela kufa.
Sonkondlo abengasenatsema lekuphila.
Sonkondlo wavuka kulabafile.
(Naleminye imibono lenembako yemukelekile.) (KUBILI kwaloku.) (2)
- 3.5 Sifundvo sekutsi kubeka litsemba kuMdali uma usetimeni letimatima kuyaphumeleisa/Sifundvo sekutsi ubobonga uma wentelwe lokuhle.
(Naleminye imibono lenembako yemukelekile.) (2)
- [10]**

UMBUTO 4: IMIBUTO LEMIFISHA**'NGOBA SEWUNGUMCABA' – GT Nkosi**

- 4.1 Imphindza ngobe kuphindvwe ligama lelifanako emgceni munye '**watjakadvula**'. (2)
- 4.2 Luchumanosicalo ngobe lemigca lemibili icalisa ngeligama lelifanako '**babodvwa**'. (2)
- 4.3 Ingcikitsi kungalaleli/tempilo/kugula ngobe sonkondlo ukhuluma ngemuntfu logula kakhulu ngenca yekungalaleli uma akhutwa ngemphilo. (KUNYE kwaloku.) (2)
- 4.4 Sonkondlo abecondze kutsi lomuntfu lakhuluma ngaye abedvwalile/abetigcabha ahambela etulu, angatsatsi teluleko talabadzala. (Naleminye imibono lenembako yemukelekile.) (2)
- 4.5 Sonkondlo usisebentise kahle lesifaniso ngobe imbali naseyikhiwe iyabuna iphelelwe ngumsebenti wayo wekwenta kube kuhle, njengaye lololele ecansini akasenamandla futsi akasenamsebenti walutfo. (Naleminye imibono lenembako yemukelekile.) (2) [10]

NA**INKONDLO LENGAKAFUNDVWA EKLASINI****UMBUTO 5****'TSANYELANI EMABALA' – MA Mhlongo**

- 5.1 Silinganisamcondvo. (1)
- 5.2 Imvumelwanosigcino leyecako. (1)
- 5.3 Secamagama. (1)
- 5.4 Lemigca yakhiwe ngemagama lasukela kulamatsatfu kuya kulasihlanu. (1)
- 5.5 Sicedzelelamcondvo ngobe umcondvo losemgceni we-21 uphelela emgceni we-22. (2)
- 5.6 Sihloko siyahambelana ngobe kukhulunyuwa ngekutsanyelwa kwemabala kulungiselelwa kufika kwebayeni batewulobola. (2)
- 5.7 Usisebentise kahle ngobe kulenkondlo kujatjuliwe, nalesifutamsindvo 'lililili!' sisetjentiswa uma kunemcimbi wenjabulo/Umshado/Emalobolo/Umtsima. (Naleminye imibono lenembako yemukelekile.) (2) [10]

SAMBA SESIGABA A: 30

SIGABA B: INOVELI/TEMDZABU**UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Sakhiwo sendzabambhalo kumele sivete **singeniso, umtimba nesiphetfo.**

Tinkhomba letisenovelini letiveta kutsi Lushawulo naTintfombi angeke bagcine kahle esiphetfweni salenoveli.

SINGENISO

Bahlolwa bachaza sihloko babuye bavete tigameko letikulenoveli letitinkhomba tekutsi Lushawulo naTintfombi angeke bagcine kahle esiphetfweni salenoveli.

Impilo yaLushawulo

- Kufika kwaLushawulo eMankayiyane atsandzane netintfombi letinyenti.
- Kulalela Tintfombi uma amtjela kutsi unina uyatsakatsa.
- Kucosha unina LaHlophe aphindze amshisele indlu.
- Kungeti emngcwabenai webantfwana bakhe atfumele emapulanka.
- Kwemukela Tintfombi abe atfole umntfwana nemlungu.

Impilo yaTintfombi.

- Kubaleka ekhaya alandzele Lushawulo.
- Kukhulelwa angakamtjeli Lushawulo.
- Kutsakatsa bantfwana baLushawulo.
- Kucambela LaHlophe emanga atsi uyatsakatsa.
- Kusebentisa umutsi wekutsi atsandvwe kakhulu kwedlula LaMagagula.

Impilo yaLaMagagula nebantfwana.

- Kungcwaba bantfwana bakhe ngaphandle kwemyeni wakhe.
- Kucelwa kutsi akhele Tintfombi indlu.
- Kujikelwa nguLaHlophe ngekutsi atsandze bantfwana baTintfombi.
- Kuhlupheka kwaLaMagagula abulawa yndlala nebantfwabakhe.
- Kuvusa likhaya lakaKhumalo acedze angasanakwa.

(Naleminye imibono lenembako yemukelekile.)

Siphetfo

Bahlolwa basonga konkhe labebabhala ngako lapha ngenhla, ngetigameko letiveta kutsi umshado waLushawulo angeke ube yimphumelelo.

CAPHELA: Bahlolwa kumele bacaphune tigameko letisenovelini letesekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B na C:

[25]

UMBUTO 7: IMIBUTO LEMIFISHA**LIPHUME NEBOVU – BB Malangwane**

- 7.1 Ludvweshu Iwangaphandle, Lushawulo ucabana nenina ngobe amsola kutsi uyatsakatsa. (2)
- 7.2 Kufuna kwati kutsi utawuphuma abhekephi LaHlophe/Wagcina ahambile yini LaHlophe? (KUBILI kwaloku) (2)
- 7.3 Iveta sibekandzaba sesimonhlalo, akukahlaliswana kahle ngobe Lushawulo utsi unina uyatsakatsa.
(Naleminye imibono lenembako yemukelekile.) (2)
- 7.4 Kucamba emanga atsi uninatala uyatsakatsa kantsi nguye lote nemutsi kaKhumalo.
(Naleminye imibono lenembako yemukelekile.) (2)
- 7.5 Kuletheksthi Lushawulo uloyisa unina nasemimangweni tiyaba khona letigameko letinjena. (2)
- 7.6 Kumfanela ngekutsi ungumlingisi longaguculwa simo, akazange awushiye umendvo wakhe naloku abehlupheka.
(Naleminye imibono lenembako yemukelekile.) (2)
- 7.7 Lesento siyingwijikwebu ngobe kuletheksthi kucoshwa unina kantsi luvutfondzaba luveta kutsi Tinfombi nguye longumtsakatsi. (2)
- 7.8 Imibono itawehluka ifake ekhatsi lokulandzelako:
Labavumako batawesekela ngekutsi: Abefanele ngobe unguinatala wakhe labehleli naye sikhatsi lesidze.
Labatawutsi abengakafaneli batawesekela ngemibono yabo lenembako.
(Naleminye imibono lenembako yemukelekile.) (2)
- 7.9 Sifundvo sekutsi ungamvisi buhlungu umtali wakho ngentfo longenaso siciniseko sayo.
(Naleminye imibono lenembako yemukelekile.) (2)
- 7.10 Betingeke iphumelele ingcikitsi yalenoveli ngaphandle kwaTintfombi ngobe nguye lowenta kutsi kuvele imphilo yasesitsenjini. (2)
- 7.11 Similo saLaMagagula kulenoveli sihle ngobe uyakwati kubeketela, nekutitfoba futsi uphuma ekhaya lelinemfundziso nemiyalo. (2)
- 7.12 Teluleko tekutsi:
 - Ahloniphe lapho endze khona.
 - Ahloniphe uninatala.
 - Abatsandze bantfu balapho endze khona.
 - Atiphatse kahle emtini.
(KUTSATFU kwaloku.)
(Naleminye imibono lenembako yemukelekile.) (3)

[25]

UMBUTO 8: UMBUTO LOYINDZABAMBHALO

KUBAMBA LETINGELAKO– DE Nkosi

Sakhiwo sendzabambhalo kumele sivete **singeniso, umtimba nesiphetfo.**

Tinkhomba letisenovelini letiveta kutsi Mphikeleli utawugcina angumholi.

SINGENISO

Bahlolwa bachaza sihloko babuye bavete tigameko letikulenovel i letitinkhomba tekutsi Mphikeleli utawugcina angumholi.

UMTIMBA

Mphikeleli nebangani bakhe.

- Msiti watfolela Mphikeleli indzawo yekuhlala.
- Matsiya umela Mphikeleli nakacoshwa esikolweni.
- Mphikeleli ukhetfwa uba ngumholi webafundzi.
- Mphikeleli akanabatali labamgcugcutela ngetindzaba tesikolo, utigcugcutela yena ngekwakhe.
- Mphikeleli uvusa likhaya lakaZwane.

Mphikeleli nebakaTsabetse.

- Tsabetse uncisha Mphikeleli indzawo yekuhlala abe abati batali bakhe.
- Magumeni ubangisa Mphikeleli ngetikhundla tekuphatsa ummango.
- Magumeni ukhankasa ngeligama laMphikeleli.
- Tsabetse ucambela Mphikeleli emanga utsi ubuya ejele futsi uliphekula.
- Tsabetse ufhlela Mphikeleli tincwadzi temathuna ebatali bakhe.

Mphikeleli nemmango.

- Mphikeleli wakhela ummango tindlu letinesitfunti.
- Mphikeleli ugcugcutela kutsi wonkhe umuntfu abuyelesikolweni.
- Mphikeleli ubamba imihlangano leta netinhlelo tekutfufukisa ummango.
- Mphikeleli wenta imiklamo yekutfufukisa ummango.
- Mphikeleli wakha ematfuba lamanyenti emsebenti.

(Naleminye imibono lenembako yemukelekile.)

SIPHETFO

Bahlolwa basonga konkhe labebabhala ngako lapha ngenhla, ngetigameko letiveta kutsi Mphikeleli utawuba ngumholi esiphetfweni.

CAPHELA: Bahlolwa kumele bacaphune tigameko letisenovelini letesekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B na C:

[25]

UMBUTO 9: IMIBUTO LEMIFISHA**KUBAMBA LETINGELAKO – DE Nkosi**

- 9.1 Ludvweshu lubangwa lukhetfo lolutawuba khona, lokwenta kutsi bangaboni ngeliso linye boKhulumile naLotifiso. (2)
- 9.2 Kukhona lokwenta tetsamelilwati tifune kuchubeka naletheksthi ngobe tifuna kuva ngemiphumela yelukhetfo lolulindvwe ngalabovu. (2)
- 9.3 Lenkhulumo yaLotifiso isho kutsi kutawuphumelela Magumeni Tsabetse kepha esiphetfweni imiphumela iveta Mphikeleli Zwane aphumelela lolukhetfo. (2)
- 9.4 Lenkhulumo iveta Magumeni angasuye umholi locotfo ngobe anganaki labo labahluphekile kepha anaka labanjingile. (2)
- 9.5 Lokuveta sibekandzaba sesikhatsi sanyalo kuletheksthi lukhetfo lolwentiwe ngummango/Kubanjwa imihlangano/Bantswana bayafundza. (KUBILI kwaloku.) (2)
- 9.6 Letinkhulumo taKhulumile tibiketela kutsi Mphikeleli utawuphumelela elukhetfweni abe ngusosifundzave. (2)
- 9.7 Inhoso yembhali bekukuveta kutsi bomake banalo liso lekubona bantfu labangaba baholi emmangweni labaphila kuwo. (2)
- 9.8 Kuletheksthi Lotifiso abefisa kutsi Magumeni aphumelele lukhetfo abe ngusosifundzave. (2)
- 9.9 Kukhula kwaMphikeleli abona batali bakhe balwela inkhululeko naye kwamgcugcutela kutsi alwele inkhululeko yebahlali baseMbalenhle. (Naleminye imibono lenembako yemukelekile.) (2)
- 9.10 Akusiyo ingwijikhwebu ngobe letento takhe nemisebenti labeyenta Mphikeleli bekukhombisa kutsi utawuba ngumholi ekugcineni. (2)
- 9.11 Magumeni akaphumeleli kuyitfufukisa ingcikitsi ngobe nguye labephikisa tinchubo taMphikeleli tekutsi bantfu bakhululeke. (Naleminye imibono lenembako yemukelekile.) (2)
- 9.12 Umuntfu lomusha lofisa kuba ngumholi ungameluleka ngekutsi:
 - Atsandze imfundvo.
 - Asebentele ummango ngekwetsembeka.
 - Akhetse baholi labacotfo.
 - Alwele emalungelo abo.
 (KUTSATFU kwaloku.) (Naleminye imibono lenembako yemukelekile.) (3)

[25]

UMBUTO 10: UMBUTO LOYINDZABAMBHALO**TIBOPHO TELUTSANDVO – JJ Thwala**

Sakhiwo sendzabambhalo kumele sivete **singeniso, umtimba nesiphetfo**.

Tinkhomba letisenovelini letiveta kutsi Lomusa naMlungisi angeke bashade esiphetfweni.

SINGENISO

Bahlolwa bachaza sihloko babuye bavete tigameko letikulenoveli letitinkhomba tekutsi Lomusa naMlungisi angeke bashade esiphetfweni.

Imphilo yaMlungisi nebangani bakhe.

- Madvodza utjela Mlungisi kutsi akacaphele abuye amhlolisise Lomusa.
- Madvodza uyamekhuta kutsi akacale ati kabanti ngemphilo yaLomusa.
- Madvodza naSikhuni bakha lisu lekutsi atibonele tintfo lebetentiwa nguLomusa.
- Mlungisi ulotjolelwa bangani kungekho bantfu labadzala.
- Mlungisi akayati imvelaphi yaLomusa.
- Sikhuni utjela Mlungisi kutsi uyayati indlovukati yetidzakamiva abe asho Lomusa.

Imphilo yaLomusa nebangani bakhe.

- Kuhlala kwaLomusa emcashweni kungatiwa imvelaphi yakhe.
- Kutfolakala kwaLomusa naNkhangala badla tidzakamiva.
- Kutfolakala kwaLomusa aboleka imali yekukhipha Sicobolo ejele.
- Kutfolakala kwaLomusa naNkhangala babala imali lekungatiwa kutsi bayitsatsaphi.
- Kungena kwaLomusa esibhedlela ngenca yetidzakamiva.
- Kukhetsela Mlungisi bangani.

Imphilo yaMlungisi nebatali bakhe.

- LaNdlovu akamfuni Lomusa ngobe angumfelokati.
 - Malume uyala kuyewumlobolela.
 - Liphupho leyise lebelimhlupha njalo.
 - Kusha kwetimpahala taMlungisi kuwadirophu.
 - Kungatsatsi tecwayiso tamalume wakhe tekutsi acale ati ngaLomusa.
 - Kulungiselela umshado ngaphandle kwetibusiso talabadzala.
- (Naleminye imibono lenembako yemukelekile.)

SIPHETFO

Bahlolwa basonga konkhe labebabhala ngako lapha ngenhla, ngetigameko letiveta kutsi umshado waLomusa naMlungisi angeke ube imphumelelo esiphetfweni salenoveli.

CAPHELA: Bahlolwa kumele bacaphune tigameko letisenovelini letesekela imibono yabo.

BONA EMARUBHRIKI EKUMAKWA KWENDZABAMBHALO, SICHIBIYELO B na C:

[25]

UMBUTO 11: IMIBUTO LEMIFISHA

TIBOPHO TELUTSANDVO – JJ Thwala

- 11.1 Loludvweshu lubangelwa kutsi Mlungisi akamfuni umngani waLomusa longuNkhangala/Lomusa akabafuni bangani baMlungisi boMadvodza naSikhuni. (KUNYE kwaloku.) (2)
- 11.2 Kukhona lokuheha tetsamelilwati ngobe titawufuna kwati kutsi Mlungisi naLomusa batawuhlukana yini nalabangani babo/Tetsamelilwati titawufuna kwati kutsi letingcoco tabo titawuphelelaphi. (KUNYE kwaloku.) (2)
- 11.3 Sikhuni akazange asicedze sikolo wangenela tidzakamiva, nalamuhla lukhona lusha loluyekela sikolo luyewuhlala emigwacweni ludle tidzakamiva/**Kuleminye imimmango lusha Iwakhona alwenti njengaSikhuni, luyafundza lumphumelele lube neticu ngobe kungekho kusetjentiswa kwetidzakamiva.** (KUNYE kwaloku) (2)
- 11.4 Lomusa abelicili wehlisa umoya ngemabomu ngobe abengafuni kuphazamisa emalungiselelo emshado/Ubalekela kukhuluma ngebatali bakhe ngobe ati kutsi bayaphila/Uvikela Nkhangala ngekutsi ambite ngengilos. (KUBILI kwaloku.) (2)
- 11.5 Lomugca uhambisana nesibekandzaba sesikhatsi salomuhla ngobe letidzakamiva lekukhulunywa ngato tiyasetjentiswa nalomuhla. (2)
- 11.6 Kuletheksthi ubonakala angasayifuni lemphilo yekudla tidzakamiva labeyiphila kusukela ekucaleni kwalenoveli/**Kuletheksthi utsi Lomusa naMlungisi abafanelani kepha uyaya kuyewumlobolela Lomusa.** (KUNYE kwaloku.) (Naleminye imibono lenembako yemukelekile.) (2)
- 11.7 Lemphendvulo iyingwijkhwebu ngobe kuletheksthi akafuni kukhulunywe ngebatali bakhe utsi imvusela emanceba kepha kuluvutfondzaba batali baLomusa bayavela bakhuluma lokwehlukile. (2)
- 11.8 Mlungisi abetama kulungisa tintfo letingahambi kahle ngesimilo saLomusa nebangani ngembikwemshado lokwenta kutsi ahambisane nelibito lakhe. (Naleminye imibono lenembako yemukelekile.) (2)
- 11.9 Kufundvwa kutsi kudla tidzakamiva kuyingoti, tingena tihlale emitsanjeni yemuntfu kube matima kutiyekela nobe angasatifuni. (Naleminye imibono lenembako yemukelekile.) (2)
- 11.10 Ingikitsi yelutsandvo beyingeke iphumelele ngaphandle kwakhe ngobe nguye labetsanza Lomusa ngalokwecile kusukela ekucaleni kwalenzaza kute kuyewufika esiphetfweni. (Naleminye imibono lenembako yemukelekile.) (2)
- 11.11 Bobabili bebadla tidzakamiva, batfolakala etindzaweni tekucedza koma, batigebengu /**Bobabili abakacedzi sikokolo.** (Naleminye imibono lenembako yemukelekile.) (2)
- 11.12 Teluleko letitsi:
 - Uma ngabe udla tidzakamiva hamba kubeluleki betemphilo/bengcondvo.
 - Hamba endzaweni lapho kuvuselelwa khona similo.
 - Ungayekeli sikolo ngobe silikusasa lakho.
 - Khetsa bangani labakahle.
(KUTSATFU kwaloku.) (Naleminye imibono lenembako yemukelekile.) (3)

UMBUTO 12: UMBUTO LOYINDZABAMBHALO

SILULU SEMASWATI – NC Mthethwa

Sakhiwo sendzabambhalo kumele sivete **singeniso, umtimba nesiphetfo.**

Tinkhomba letiveta kuphumelela nobe kumatima kulobuciko bemlomo lobubaliwe.

SINGENISO

Bahlolwa bachaza sihloko babuye bavete tintfo letibufakazi bekutsi ungacala matima kodvwa ekugcineni uphumelele.

Impilo yentfombatane kulenganekwane letsitsi Intsandzane Nenhanti Yemilingo.

- Intfombatane yakhula matima ingenanina ishaywa kabuhlungu.
- Intfombatane beyihlushwa ngumake lomncane wayo, yenta yonkhe imisebenti yasekhaya.
- Intfombatane beyilusa tinkhomo, inefwa timvula, ishiswa lilanga imini yonkhe.
- Intfombatane beyiganikwa nekudla yate yasitwa yinhlanti emfuleni.
- Intfombatane nobe ikhule matima kodvwa ekugcineni yaphumelela yashada nendvodzana yenkhosi.

Impilo yenkhosi Tobias Nkosi.

- Inkhosim Tobias yalahlw, yakhula njengentsandzane.
- Inkhosim yalahlw njengentfo lengenamsebenti yanganakwa.
- Inkhosim yakhuliswa ngugogo wayo waseFeni.
- Inkhosim yaba lusito kubantfu baseSteyn dolobha.

Sifaniso: Kulahliswa kwenyongo yenyatsi- kushiya umuntfu ebaleni angenayo indlela yekutisita.

- Inkhosim Tobias yashiya ebaleni kabuhlungu yalahlw njengenyongo yenyatsi kepha ekugcineni yaphumelela yabekwa yaba yinkhosim yesive.

SIPHETFO

Bahlolwa basonga konkhe labebabhala ngako lapha ngenhla, ngekuveta kutsi nobe ungakhula uhlupheka kepha ekugcineni uyaphumelela.

(Naleminye imibono lenembako yemukelekile.)

CAPHELA: Bahlolwa kumele bacaphune emaphuzu lasencwadzini lasekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B ne-C:

[25]

UMBUTO 13: IMIBUTO LEMIFISHA**SILULU SEMASWATI – NC Mthethwa****INDLULAMITSI NENGWENYA**

- 13.1 Inganekotilwane ngobe balingisi bakhona tilwane. (2)
- 13.2 Kukhona, kufuna kwati kutsi njengobe indlulamitsi ingakwati kuhlamba itawuhamba njani iyewufika ekhaya lengwenya. (2)
- 13.3 Ludvweshu Iwangaphandle, kuneungavisansi emkhatsini wendlulamitsi nengwenya ngobe ayifuni kungena emantini. (2)
- 13.4 Ngumlayeto wekutsi yati kukhetsa bangani labacotfo nalongabetsema. (2)
- 13.5 Lesigameko siveta umoya wekwesaba nekwetfuka ngobe ingwenya idla letinye tilwane. (2)
- 13.6 Indlulamitsi seyifikelwa kwesaba nekungametsembi lomngani wayo kutsi kungenteka ifike ekhaya lengwenya idliwe ibe inyama. (2)
- 13.7 Ingwenya isilwane:
 - Lesisatjwako.
 - Lesinebungoti.
 - Lesingaketsembeki.
 (Naleminye imibono lenembako yemukelekile.) (3)

TIBONGO TENGWENYAMA BHUNU

- 13.8 Sicedzelelamcondvo ngobe lomcondvo wemugca we-2 uphelela emigceni lelandzelako. (2)
- 13.9 Imvumelwanosigcino leyecako ngobe lemigca igcina ngelilunga lelifanako 'ni', bese umugca losemkhatsini uyehluka ekugcineni. (2)
- 13.10 Lomugca uchaza kutsi lenkhosi iyephana/Inkhosi iyasondla sive, asilambi/Inkhosi inenhlitiyo lenhle/Iyasicabangela sive sayo. (2)
- 13.11 Letibongo tinemigca le-20, emagama asukela kulamabili kuya kulamane. (2)
- 13.12 Ngikuphica ngenyoni yami legitjelwa bantfu ibasuse kulenye indzawo, ibayise kulenye. (2)

SAMBA SESIGABA B: **25**

SIGABA C: UMDLALO**UMBUTO 14: UMBUTO LOYINDZABAMBHALO
KUTAWUBA NJALO – SZ Simelane**

Sakhiwo sendzabambhalo kumele sivete **singeniso, umtimba nesiphetfo.**

Babhala tigameko letiveta lokwenteka emdlalweni lokubufakazi bekuvetwa kwalabadlali ngalendlela.

Singeniso

Bahlolwa bachaza sihloko babuye basho kutsi labadlali baphumelele kudlala letindzima labalindzeleke kutidlala emdlalweni.

Umtimba

Bahlolwa baveta bufakazi bekutsi baphumelele kudlala letindzima letisemdlalweni.

Ncobile ungumdlali logcamile/ummeleli.

- Ncobile ekucaleni uvete anenkinga yekushonelwa singani sakhe.
- Ncobile nguye umdlali lohambisana nesihloko.
- Ncobile ubukene nenkinga yekukhetselwa singani.
- Ncobile ubukene neluchungechunge lwetinkinga.
- Ncobile uyaphumelela ushada nesingani latikhetselie sona.

Hleta ungumkhweteli.

- Hleta uta nelisu lekubulala Gedlembane.
- Hleta utsi akushiswe sitfombe saGedlembane.
- Hleta utjela LaHleta kutsi Ncobile utsandzana naMphotfo.
- Hleta utjela Mphotfo kutsi sisu saNcobile sibikiwe kaMavimbela.
- Hleta uta nelisu lekutsi balandzele Ncobile ngalesikhatsi aya emathuneni.

LaMagagula ungumelekeleli.

- LaMagagula welekelela LaHleta kwecwayisa Ncobile.
- LaMagagula wemukela Ncobile ngalesikhatsi acoshwe nguMphotfo.
- LaMagagula upheleketela Ncobile esibhedlela.
- LaMagagula uhlanganisa Ncobile nenina bayacolelana.
- LaMagagula ufaka sandla emphumelelweni yaNcobile.
(Naleminye imibono lenembako yemukelekile.)

Siphetfo

Bahlolwa basonga konkhe labebabhala ngako lapha ngenhla, lokufakazela kutsi baphumelele kudlala letindzima.

CAPHELA: Bahlolwa kumele bacaphune tigameko letisemdlalweni letesekela imibono yabo.

BONA EMARUBHIKI EKUMAKWA KWENDZABAMBHALO, SICHIBIYELO B na C:

[25]

UMBUTO 15: IMIBUTO LEMIFISHA**KUTAWUBA NJALO – SZ Simelane**

- 15.1 Aveta sibekandzaba sendzawo, kusemakhaya ngobe kusanatfwa emahewu ngendzebe. (2)
- 15.2 Umoya wekujabula, bayacoca bakhumbula tindzaba takudzala/Babajulele imoto yaNcobile. (KUNYE kwaloku.) (2)
- 15.3 Utjela Ncobile kutsi imoto ayiyobikwa ethuneni leyise/Ncobile akayewukhomba babekati wakhe LaMagagula imoto. (KUNYE kwaloku.) (2)
- 15.4 Lokwamvisa buhlungu sewukwenta emahlaya/Ucolele unina namalume wakhe ute ufunu kuyewumkhomba imoto/**Sewuyakhulumisana naMphotfo.** (**KUBILI kwaloku**) (2)
- 15.5 Ncobile unemoto lekufanele ayoyibika emathuneni/Celiwe umngani waNcobile naye urike ngemoto/Ncobile kumele ayewukhomba malume nababekati wakhe imoto. (KUBILI kwaloku.) (2)
- 15.6 Esingenisweni salomdlalo Ncobile nenina abevani bayacabana kodvwa kuletheksthi bajabulile, bayahleka bakhumbula tindzaba takudzala lebetibacabanisa.
Ekucaleni bebabangani labafundza sikolo balekelelana kepha kuletheksthi sebaneticu, Celiwe sewungusotimalimabhuku ebhange. (**KUNYE kwaloku**) (2)
- 15.7 Abehlose kukhutsata bafundzi kutsi kufundza ngekutimisela, nekwelekelelana etifundvweni kunemtselela lomuhle/Kuveta kutsi bomake banalo likhono lekufundza, bacashwe etikhundleni letisetulu babuye baphumelele batimele emphilweni bangakasekelwa ngemadvodza. (KUNYE kwaloku.) (Naleminye imibono lenembako yemukelekile.) (2)
- 15.8 Ngumlayeto wekutsi bangani beliciniso abalahlanu ngetikhatsi letimatima nobe tenjabulo/Bangani beliciniso babokhutsatana. (KUNYE kwaloku.) (Naleminye imibono lenembako yemukelekile.) (2)
- 15.9 LaHleta uma abukene nebumatima ngemphilo yaNcobile abebikela LaMagagula njengobe uyise angasekho, lokusho kutsi abekudzinga kwesekelwa. (2)
- 15.10 Kunika Ncobile litfuba lekubuyela esikolweni emva kwekubaleka ekhaya, aphindze amsalele nemntfwana, amkhulisele yena. (2)
- 15.11 Lengoco beyibiketela kutsi batawubuyiselana bashade njengobe kwenteka esiphetfweni salomdlalo. (Naleminye imibono lenembako yemukelekile.) (2)
- 15.12 Lesincumo:
 - Savimbela kutsi umntfwana waNcobile angahlupheki.
 - Savimbela kutsi Ncobile nenina bangabi titsa.
 - Savimbela kutsi Ncobile angalahlekelwa nguMphotfo.
 - Savimbela kutsi Lomalungelo angakhuliswa ngumtali munye.
(KUTSATFU kwaloku.) (Naleminye imibono lenembako yemukelekile.) (3)

[25]

UMBUTO 16: UMBUTO LOYINDZABAMHALO**LAMI LISIPHETFO – JJ Thwala**

Sakhiwo sendzabambhalo kumele sivete **singeniso, umtimba nesiphetfo**.

Babhala tigameko letiveta lokwenteka emdlalweni lokubufakazi bekuvetwa kwalabadlali ngalendlela.

Singeniso

Bahlolwa bachaza sihloko babuye basho kutsi labadlali baphumelele kudlala letindzima letisemdlalweni.

Umtimba

Bahlolwa baveta bufakazi bekutsi baphumelele kudlala letindzima letisemdlalweni.

Inkhosi Somhlolo ungumdlali logcamile/ummeleli.

- Inkhosoi Somhlolo ekucaleni ivetwe ibangiswa bukhosi.
- Inkhosoi Somhlolo ngiyo lehambisana nesihloko.
- Inkhosoi Somhlolo ibukene nenkinga yekuketulwa kwembuso kusukela umdlalo ucalal ute uyewufinyelela esiphetfweni.
- Inkhosoi Somhlolo ibukene neluchungechunge lwetinkinga.
- Inkhosoi Somhlolo iyancoba ekugcineni, kufa kwaMahubhulu isala ingabangiswa ngumuntfu.

Indvuna Nsibandze ingumelekeleli.

- Nsibandze welekelela inkhosoi kuletsa kuthula eveni layo ngekuyifunela sihlobo kaMabhoko.
- Nsibandze weskela inkhosoi kuko konkhe.
- Nsibandze uyindvuna letsembekile nalecotfo.
- Nsibandze welekelela inkhosoi ngekubonisa Mahubhulu kutsi ahloniphe.

Indvuna Mahubhulu iyimbangi.

- Mahubhulu ubangisa inkhosoi Somhlolo bukhosi.
- Mahubhulu uvivisa libutfo ngaphandle kwemvumo yenkhosi.
- Mahubhulu wedzelela inkhosoi uyibita ngeligwala.
- Mahubhulu utjela inkhosoi kutsi lakhe lisiphetfo.
- Mahubhulu wehluleka kutsatsa bukhosi ugcina ngekutibulala.
(Naleminye imibono lenembako yemukelekile.)

Siphetfo

Bahlolwa basonga konkhe labebabhala ngako lapha ngenhla, lokufakazela kutsi baphumelele kudlala letindzima.

CAPHELA: Bahlolwa kumele bacaphune tigameko letisemdlalweni letesekela imibono yabo.

BONA EMARUBHRIKI EKUMAKWA KWENDZABAMHALO, SICHIBIYELO B na C:

[25]

UMBUTO 17: IMIBUTO LEMIFISHA**LAMI LISIPHETFO – JJ Thwala**

- 17.1 Aveta lomdlalo wenteka endzaweni yasemakhaya ngobe kunesigodlo lokuchaza kutsi kubusa inkhos. (2)
- 17.2 Letingcoco tiveta simo lesishubile ngobe Mahubhulu akafuni kulalela umuntfu futsi ukhombisa kungayihloniphi inkhos. (2)
- 17.3 Ngembi kwekutsatsa tincumo inkhos icala ibonisana netindvuna tayo. (2)
- 17.4 Iyalilandzela libito layo ngobe lisho kuvelelwa timanga/umhlolo njengobe Mahubhulu ashayela inkhos umtsetfo kutsi kumele ibuse njani esigodlwani nobe eveni layo. (2)
- 17.5 Ekucaleni kwaletheksth kunenkinga lebukene nemdlali longubangiswako/Kuvele neligama lendzawo lapho umdlalo wenteka khona. (2)
- 17.6 Letheksth inebadlali labanyenti labadlula labasihlanu, lokuphula imigomo yemdlalo wasesiteji. (2)
- 17.7 Lesakhiwana besingeke sibe khona ngobe kubanjwe lomhlangano ngesizatfu sekutsi Mahubhulu ulwa nendlela inkhos Somhlolo lebusa ngayo.
(Naleminye imibono lenembako yemukelekile.) (2)
- 17.8 Ludvweshu Iwangaphandle ngobe Nsibandze uvete ngalokusobala kutsi kukhona kungaboni ngeliso linye/ Lenkhulumo iveta kutsi kunegevani ngaloko lekukhulunywa ngako. (2)
- 17.9 Mahubhulu ukhulele ekhaya lapho bekabona batali bakhe balwa timphi bawisa emadvodza ngetikhali kungako ahlala ayimphi. (2)
- 17.10 Mahubhulu uphumelilise ingcikitsi ngekutsi avukele inkhos angenetiseki ngendlela ibusa ngayo/Ngekutsi angaboni ngeliso linye nenkhosi Somhlolo.(KUNYE kwaloku.) (2)
- 17.11 Letinkhulumiswano betibiketela kutsi Mahubhulu utawugcina kabi futsi angeke alibuse laNdvungunya. (2)
- 17.12 Lesincumo:
 - Savimbela inhlupheko esiveni.
 - Savimbela kucitseka kwengati.
 - Savimbela kungatsatwa kwembuso.
 - Savimbela kwehlukana kwemabutfo esive.
(KUTSATFU kwaloku.) (3)
[25]

SAMBA SESIGABA C: 25
SAMBA SAKO KONKHE: 80

SICHIBIYELO A**SIGABA A: IRUBHRIKI YEKUHLOLA INDZABAMHALO YENKONDLO [10 EMAMAKI]**

Timphawu	Emalengiso	Licophelo leisetulu	Lokwenetisako	Lokusilele	Lokungaphumeleli
LOKUCUKETFWE	5-6	4	3	2	0-1
Kuchazwa kwesihloko Kujula kwemibono, Kwesekela nekuvisiswa kwetheskthi 6 EMAMAKI	-Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe enkondlweni -Luhlobo lwembhalo kanye nenkondlo kuvisiswa ngemalengiso	-Sihloko sichazwe ngelicophelo leisetulu kukhomba kusivisa -Emaphuzu ekwesekela ayevakala kodvwa akaketfulwa ngendlela lelindzelekile -Luhlobo lwembhalo kanye nenkondlo kuvisiswa ngelicophelo leisetulu	-Sihloko sichazwe ngalokwenetisako -Akhona lamanye emaphuzu lamahle lesesekela sihloko ngalokwenetisako -Leminye imibono yesekelwe kodvwa esikhatsini lesinyenti bufakazi abukholweki -Luhlobo lwembhalo kanye nenkondlo kuvisiswa ngalokwenetisako	-Kuchazwa kvesihloko akwenetisi -Kulukhuni kutfola emaphuzu lesekela sihloko -Luhlobo lwembhalo kanye nenkondlo akukavisiswa kahle	-Sihloko asikavisiswa nakancane -Akukho kucaphuna enkondlweni -Luhlobo lwembhalo kanye nenkondlo akukavisiswa nakancane
SAKHIWO NELULWIMI	4	3	2	1	0-1
Sakhiwo, Kuhleleka nekwetfula Kusetjentiswa kwelulwimi, umoya, nesitayela 4 EMAMAKI	-Sakhiwo lesibumbene ngemalengiso -Imibono yahkiye yahleleka ngalokucace ngemalengiso -Lulwimi, umoya nesitayela kuvutsiwe futsi akunamaphutsa -Emaphutsa eluhlelo, sipelingi netimphawu tekufundza kuyindlala	-Sakhiwo lesicacile lesinemibono lehleleke ngelicophelo leisetulu -Imibono letfuliwe iyalandzeleka -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kubumbana nekuhleleka kwemibono kuyenetisa -Lulwimi lunemaphutsa langasho lutfo; umoya nesitayela kuyenetisa	-Sakhiwo sikhomba emaphutsa ekuhlela -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akukemukeleki	-Sakhiwo lesingemukeleki nakancane -Imibono ihlangahlangene -Lulwimi lolunemaphutsa lamanyenti nesitayela lesingemukeleki -Umoya nesitayela akwemukeleki nakancane

CAPHELA: Nangabe umhlolwa angakabhali ngalokufunwa ngumbuto, abe abhale lokunhlanhatsako, akanganikwa emamaki ako kokubili, Lokucuketfwe, Sakhiwo neLulwimi.

SICHIBIYELO B**SIGABA B NE-C: IRUBHRIKI YEKUHLOLA INDZABAMBHALO – YENOVELI NEMDLALO [25 EMAMAKI]**

Timphawu	Emalengiso	Licophelo leisetulu	Lokwenetisako	Lokusilele	Lokungaphumelelisi
LOKUCUKETFWE	12–15	9–11	6–8	4–5	0–3
Kuchazwa kwesihloko Kujula kwemibono, Kwesekelwa nekuvisiswa kwetheksth 15 EMAMAKI	-Imphendvulo lenemininingwane lengemalengiso lababatekako: 14–15 Imphendvulo lenemininingwane lengemalengiso langababateki: 12–13 -Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe etheksthini -Luhlobo lwembhalo kanye netheksth kuvisiswa ngemalengiso	-Imphendvulo lenemininingwane lesecophelwesi leisetulu -Sihloko sichazwe ngelicophelo leisetulu kukhomba kusivisa -Lamanye emaphuzu ekwesekela ayevakala kodvwa akakfulwa ngendlela lelindzelekile -Luhlobo lwembhalo kanye netheksth kuvisiswa ngelicophelo leisetulu	-Sihloko sichazwe ngalokwenetisako kodvwa akusito tonkhe tinhlangotsi leticikelwe ngalokuphelele -Akhona lamanye emaphuzu lamahle lesekela sihloko ngalokwenetisako -Lamanye emaphuzu esekelwe kodvwa esikhatsini lesinyenti bufakazi abukholweki -Kukhona lokusilele ekuvisiseni luhlobo lwembhalo kanye netheksth	-Sihloko sichazwe ngekunyanyalata ngaphandle kwemininingwane lesekelako -Ambalwa kakhulu emaphuzu lafanele kwesekela sihloko -Kuncane kakhulu kuvisiswa kweluhlobo lwembhalo netheksth	-Kuncane kakhulu kuvisiswa kwesihloko -Mncane kakhulu umzamo wekuphendvula umbuto -Imibono ayikholweki -Luhlobo lwembhalo kanye netheksth akukavisiswa nakancane
SAKHIWO NELULWIMI	8–10	6–7	4–5	2–3	0–1
Sakhiwo, Kuhleleka nekwetfula Kusetjentiswa kwelulwimi, umoya, nesitayela 10 EMAMAKI	-Sakhiwo lesibumbene -Singeniso nesipheto lesingemalengiso -Imibono yahkiye yahleleka ngemalengiso -Lulwimi, umoya nesitayela kuvutsiwe futsi akunamaphutsa	-Sakhiwo lesicacile lesinemibono lehleleke ngelicophelo leisetulu -Singeniso nesipheto kanye naletinye tindzima kuhleleke ngalokubumbene -Imibono ihleleke ngelicophelo leisetulu -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kuhleleka nekubumbana -Kuhleleka nekubumbana kwemubono kuyenetisa kodvwa kunemaphutsa -Lulwimi lunemaphutsa lambalwa; umoya nesitayela kuyenetisa Kuhleleka kwetindzima kuyenetisa	-Sakhiwo sikhomba emaphutsa ekuhlela -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akwemukeleki Kuhleleka kwetindzima kunemaphutsa	-Kungahleleki kahle kxesakhiwo kuhhinyabeta kubumbana kwemibono -Emaphutsa elulwimi nesitayela lesingakemukeleki kwenta lombhalo ungabi yimphumelelo -Umoya nesitayela akwemukeleki -Tindzima tihangahlangene
KWEHLUKA KWEMAMAKI	20–25	15–19	10–14	5–9	0–4

- Kufanele kungabi nemehluko wemazinga lamabili emkhatsini welimaki leSakhiwo neLulwimi nelimaki laLokucuketfwe.
- Imphendvulo lengaphendvuli umbuto ayinganikwa emamaki aLokucuketfwe neweLulwimi neSakhiwo.